



Whakarāpopotohanga o te Uiuinga Hapori

Ko tēnei whakarāpopotohanga ko te wāhanga tuatahi te tukanga uiui o Porirua Development, he kaupapa i rere mai i te Poutū-te-Rangi ki te Hakihea 2019.

I rapu kōrero mātou mō ngā mea tino whakahirahira ki ngā tāngata o te rāwhiti o Porirua, ngā mea hei whakapakari ake, me ngā mea e hiahia ana i te pae tawhiti. I matapakihia ngā take whakatū whare, te taiao, ngā waka tūmatanui, ngā ara mō te hunga hauā, ngā pāka, ngā wāhi mārakerake, ngā whare hapori, ngā whare hokohoko me ngā kaupapa hauora. He maha ngā ara rerekē i takahia hei kohi i ngā whakaaro, mā te wānanga kanohi ki te kanohi, te wānanga awheawhe, te hui nui, te whakawhitī kōrero mā te Social Pinpoint, he pūnaha rorohiko kohikohi whakaaro.

He nunui ngā kōrero i kohia kia mārama ai mātau ki ngā mea whakahirahira, ngā momo wheako me ngā wawata o ngā tāngata o te rāwhiti o Porirua.

Ko tēnei he whakarāpopotohanga o ngā uiuinga nei. Ko te roanga ake o ngā kōrero nei kei te *Community Engagement Report: Whakawhānaungatanga*.

Kōrero whakamārama

I te Whiringa-ā-Rangi 2018 i whakataungia e te Kāwanatanga hei ngā 25 tau kei mua i te aroaro kia whakapaungia te \$1.5 piriona tāra ki te mahi ki te taha o ngā tāngata o te rāwhiti o Porirua ki te whakahou i te tērā takiwā. E kawea ana te kaupapa Porirua Development e Kāinga Ora, Porirua City Council me Ngāti Toa Rangatira.

Ko te aro o Porirua Development ko te kounga o ngā whare, te whai kōwhiringa whare me te whakaheke utu o ngā whare ka tahi, ka rua he whakapiki i ngā hua ohanga me ngā hua-ā-tangata kia pai ake ai te rāwhiti o Porirua hei wāhi noho, hei wāhi mahi, hei wāhi mō te whānau hoki.

Ka korowaingia e te kaupapa nei ngā āhuatanga katoa e hāngai ana ki te whakapaipai i ngā rohe kiritata kia ngāwari ake te mahi moni, te hui tahi, te häereere ki tēnā wāhi, ki tēnā wāhi.

I te Poutū-te-Rangi 2019, i timata te kaupapa uiuinga hapori kia mārama ai ngā wawata me ngā hiahia ka tahi, ka rua, kia whai wāhi atu ai ngā whakaaro o te hapori ki ngā mahere me ngā tukanga o Porirua Development.

Whakarāpopotohanga o ngā kōrero i kohia

I ngā marama e iwa i kohia ngā kōrero mai i ngā wāhanga maha o te hapori e pā ana ki ngā kaupapa huhua.

Hei kōrero whānui, ko ngā whare, te taiao me te hauora o te tangata ngā kaupapa i tino kōrerohia e ngā tāngata. Ko ētahi anō kaupapa whānui i kōrerohia ko ngā wāhi mārakerake, te whanaungatanga o tēnā ki tēnā, ngā mahi whakangahau, te kawea tangata me te noho marutau ki rō hapori.

Ko ētahi kaupapa i whai wāhi nui atu ki ngā whiringa kōrero ko ngā whare hapori, ngā waka tūmatanui, te toi, ngā momo ahurea me te pakaritanga o ngā ratonga whakaora tangata me te hauora.

He nui te hunga e kaha tautoko ana i te panonitanga o ngā whare i te rāwhiti o Porirua, engari i reira ngā nguengue. He āwangawanga nō ētahi kei panaia ngā tāngata ki wāhi kē kātahi e kore e taea te hoki mai nā te pikinga o ngā utu rihi whare.

He hiahia nō ngā tāngata o te rāwhiti o Porirua kia whai wāhi nui ki te kaupapa nei, kia whai wāhi ki ngā whakataunga e pā atu ai ki a rātou. Ko te wawata kia whai wāhi atu ki te mahi ngātahi ki a Kāinga Ora i te whakamaheretanga me te whakatinanatanga o tēnei kaupapa.

Ngā āwangawanga matua

I puta ēnei āwangawanga i ngā tāngata:

- kei panaia ngā tāngata i ō rātou whare
- kei ngoikore haere ngā hononga ki ō rātou whare
- kei piki te utu, ngā hua whānui o te memehatanga o te hapori
- te kore whakamōhio atu, te tinihanga me te kōrero rūkahu
- te taumaha ka pā atu, pēnei tonu i tērā atu whakahoutanga
- te tukanga me te hiahia kia kore ai e mahue
- te kore mārama ko wai mā ngā rōpū e whai wāhi atu ki te whakahounga
- te hua o te whanaketanga nei mō te hapori ka tahi, ka rua ko wai ka whiwhi i te pūtea
- kāore pea te katoa e rite ana mō te whakahounga.

Ahakoa ēnei āwangawanga, kei te kite ngā tāngata i te rerekētanga o te tukanga nei, ehara i te kaupapa e pā ana ki a

rātou, engari kē he kaupapa e whai wāhi atu ai rātou hei tauira ngā whare – kua nuku ngā whakaaro mai i a rātou anō ki ngā wawata o te hapori whānui.

I pēhea mātou i torotoro atu ai

I tū ai ngā kaupapa whakawhitihiti kōrero maha i te tau 2019:

- Ka Mua Ka Muri: neke atu i te 40 ngā hui awheawhe, i reira ngā tamariki kura me ngā kaitoi o tērā takiwā
- Te kaupapa Share Your Voice (Pipiri me te Hongongoi)
- ngā tēpū ki CAREERfest, te Pacific Night Market me te Waitangirua Market
- He Wāhanga Whakawhitihiti kōrero ki Change is Coming (Whiringa-ā-Rangi ki te Hakihea) i hāngai pū ki tēnā iwi ki tēnā iwi
- ngā māhere rorohiko me ngā uiui mā te Social Pinpoint
- te hui ki ngā tāngata e pāngia ana e te kaupapa nei.


Hei mahi ngātahi, i tuhia te Pacific Engagement Strategy me te Youth Engagement Strategy kia mōhio pū mātou e tika ana tō mātou toro atu ki tēnā, ki tēnā.

I pēhea te kupu i rere ai ki tawhiti

I hiahia mātou kia maha noa atu ngā tāngata o te rāwhiti o Porirua i tuku whakaaro mai kia whai reo ai rātou, nā whai anō i pēnei tā mātou whakatairanga atu i ngā kaupapa nei:

- he pārongo e hāngai ana ki Porirua Development me Porirua City ngā pae tukutuku me te whārangī pukamata o te Kaunihera, waihoki, i whakairihia ki ngā whārangī Pukamata o te hapori
- ngā pūrongo me ngā īmēra o Porirua Development
- i tuku ngā pānui whakatairanga ki ngā kāinga, ngā toa, ngā pākihi, ngā mākete, ngā hāhi, ngā kura me ngā ratonga hapori i te rāwhiti o Porirua
- i tae atu ki ngā hui o ngā rōpū-hapori me ngā hui mō te hapori o ngā Moutere o Te Moana nui-a-Kiwa
- te tuku whakatairanga ki te Kapi-Mana News
- te whakapāoho i ngā whakatairanga ki Samoa Capital Radio.

Neke atu i te 2,300 ngā tāngata i whai wāhi atu ki tēnei kaupapa uiuinga i te tau 2019, he neke atu i te 5,000 ngā momo whakaaro i tukuna mai. I whai wāhi atu ki ngā whiringa te hunga whai whare, ngā rangatira o te hapori me te hāhi, ngā ākonga kura, ngā māngai o ngā rōpū hapori, ratonga whakaora tangata me te kāhui whai pākihi.





He aha ngā kaupapa whānui i kōrerohia

Ngā whare

He mahia ngā tāngata i tuku kōrero mō te whakahirahira o ngā whare maroke, mahana, marutau, ngāwari mō te hunga hauā hoki. He mahia ngā whakaaro e pā ana ki ngā momo whare, ngā hoahoa whare, me ngā hua mehemea ka maha noa atu ngā tāngata.


I matua mārama ngā tāngata me whanake ake, heoi, i āwangawanga hoki rātou ki ngā pānga kino mehemea ka maha noa atu ngā tāngata engari kāore e āta whakaarohia ngā wāhi mārakerake, ngā pāka motukā, ngā whakaritenga rori me te marutau.

I tautokona te whakaaro kia maha ngā momo whare me ngā hoahoa whare, he mea e kitea i ngā kauwhata o raro nei. Ahakoa e kaha tautokona ana te hanga i ngā whare nunui, he āmaimai hoki ki ngā panonitanga.

Kei te āwangawanga ngā tāngata ki te hanga o ngā whare nunui me ngā hoahoa o ngā whare hou. Kei te mārama rātou ki te wawata kia nui noa atu ngā whare, engari kei te hiahia rātou kia aro atu ki ngā hoahoa whare mō ngā whānau nunui me ngā whānau reanga maha. E hiahia ana te rahi o te tangata i ō rātou ake kāinga, nā whai anō he nui te wawata kia hangaia ngā whare māmā te utu.

I āwangawanga ngā tāngata ki te memehatanga o ngā hapori, ko ngā tāngata o tēnei takiwā e panaia ana i te nui o ngā utu rīhi, te hokonga atutanga o ngā whenua o te kāwanatanga, me te korekore haere o te momo motuhake o te rāwhiti o Porirua. I āwangawanga te rahi ki te torutoru o ngā whare māmā te utu, ahakoa hoko whare rānei, rīhi whare rānei, waihoki, i āwangawanga rātou ki te reanga o muri mai me te kore āhei o te hunga rā ki te hoko whare.

Concern versus desire for change to housing





Te taiao

He nui te kōrero i puta i te kaupapa kohikohi para me te whakakore i te rāpihi, mai i te kaupapa whakakore pararopi ki te whakakahia i ngā kaupapa hangarua. I hiahia ngā tāngata whai whare hangarua me ngā ipu para nui ake i ngā pokapū toa, ngā pārongo hangarua pai ake, me ngā mahi ki te aukati i te karawhiu rāpihi.

He mea nui te whakariterite i te wai āwhā me te wai paruparu, i te āwanganawa ngā tāngata ki te ora o ngā wai māori me te paru o te wai i te ranga ki Te Awarua-o-Porirua.

I hiahia hoki ngā tāngata kia maha ake ngā wāhi kākāriki, ngā kāri hapori, ngā tiriti ataahua me ngā ara ki ngā ngahere. I te āwanganawa ki ngā pānga kino o ngā whare nunui, nō reira i hiahia rātou kia whai wāhi atu ngā wāhi kākāriki ki te mahere me ngā hohoa.

Te haere ki tēnā wāhi, ki te tēnā wāhi

I whakaae te nuinga, ahakoa te utu o te penehini me te whakatikatika motukā, he ngāwari ake, he tere ake, he māmā ake te whakamahi motukā. Ko tētahi o ngā mea nui ko te whakarite i tētahi pūnaha hāereere kia taea e tēnā, e tēnā te tae atu ki te wāhi e ahu atu nei rātou - mā raro, mā runga paihikara, mā runga motopaika, mā runga motokā rānei.

He kaupapa whakahirahira ngā whakaritenga rori, pāka motukā, ara hīkoi hoki. Ko te whakamarutau me te whakangāwari i te hāereere ki rō pokapū tāone te horopaki.

Ko te whakaaro o te nuinga - kāore te pūnaha kawe i te tūmatanui o te rāwhiti o Porirua i te paku eke ki te kounga e wawatatia ana. Kāore ngā tāngata i paku hiahia ki te whakamahi nā runga i te torutoru o ngā pahi, te kore tae mai o ngā pahi, te tawhiti o ngā tūnga pahi, te māku me te mōrearea o ngā tūnga pahi, te koretake o ngā ara pahi me te kore tūhono ki ērā atu momo waka tūmatanui.

He kaupapa tūturu te pūnaha tūmatanui, i ētahi wā kāore e taea e ngā pahi te tūturi iho nā ngā ara hīkoi me te rōnaki o te rori, he torutoru rawa ngā tūru, e kore hoki ngā tūru wīra, ngā anga hīkoi, ngā perēme rānei te kuhu atu nā te hanga o ngā pahi.

Ko te kanukanu o ngā rori me ngā ara hīkoi he mea aukati i ngā tāngata e hīkoi ana, e whakamahi tūru wīra, anga hīkoi, perēme ana rānei. Kei te āwanganawa ngā tāngata kei tukia ki te mōtuka, he heahea rānei nō ngā kaitaraiwa i ngā whakawhitinga motukā, te maha o ngā motukā i te wā taumaha.

He nui te hunga e tautoko ana i te whakapaunga pūtea ki ngā ara hīkoi kia marutau ai te tangata, kia whānui ake ngā ara, kia taea e ngā tāngata hauā te whakamahi, kia tūhono hoki ki ngā tiriti, mā reira ngā tāngata e hiahia ai ki te hīkoi. I hiahia hoki ngā tāngata kia nui noa atu ngā ara paihikara, tautoko i ngā ara motuhake mō te paihikara, he kaupapa whakaako kaitaraiwa motukā, me ngā tūhono ara paihikara pai ake.

Ngā pāka me ngā wāhi mārakerake

Ko ngā whakaaro matua e pā ana ki tēnei kaupapa ko te hanga pāka me ngā wāhi whakangahau; te whakamarutau i ngā papa tākaro, te whakapai i ngā ara ki taea e te hunga hauā te whakamahi; te whakaataahua i te taiao mā te whakatō i ngā rākau taketake; he taiapa ki ngā papatākaro; te whakahaere i ngā kaupapa whakangahau mō te hapori me ngā kaupapa ahurea; te tiaki i ngā taonga e mōhiotia ana ko Bothamley Park me ngā roto o Cannons Creek.

I pīrangī ngā tāngata kia whakatūngia ngā wāhi hapori pai ake, pēnei i ngā wāhi kai hunuhunu, he rua umu, he wāhi noho, he wharepaku, he wāhi inu wai, he raiti pai ake, he rākau hei whakamarumaru i ngā wāhi whānau, he taputapu hākinakina hoki. I whakaaro ētahi he kaupapa tēnei ki te whakatakoto i ngā wawata ki te whakatū i ngā wāhi whakangahau pēnei i te atamira, he wāhi mō ngā whakataetae hākinakina, hei tauira kilikiti (Kirikiti o Hāmoa), he wāhi hoki mō ērā atu momo hākinakina me ngā wāhi whakaako tamariki.



Ngā pokapū toa

He tata atu ki te haurua o ngā tāngata e hiahia ana kia maha ake ngā momo toa i te pae tawhiti, pēnei i te whakawhānuitanga o ngā mākete, he toa hokomaha me te toa hoko mīti, he toa hoko kākahu me ngā papanga hoki. I hiahia ngā tāngata kia torutoru ake ngā toa hoko kai kawe atu, ngā pāparakāuta me ngā TAB, ā, kia maha ake ngā toa hoko kai pai me ngā toa hoko kai nō whenua kē. He hiahia nō ngā tāngata kia whai pakihī ngā tāngata o tēnei takiwā, mā reira e whai kaimahi nō tēnei takiwā hoki.

Whare hapori

I hiahia ngā tāngata kia tino whakahoungia ngā pāka, kia hangaia ngā wāhi e marutau ai te tangata, e taea e te hunga hauā te tae mai, he wāhi whānau, he wāhi hākinakina. E tino hiahiatia ana, e tika kia whakatūria hoki, ngā wāhi hapori i te rāwhiti o Porirua. Ko ngā whare hapori o nāianei he torutoru rawa ka tahi, kāore i te tika ka rua.

He tino maha ngā tāngata e hiahia ana i ngā wāhi hākinakina pai ake ki te rāwhiti o Porirua, kei te hiahia kia maha ake ngā kaupapa hākinakina hoki. Ko ētahi whakaaro - he whare hākinakina e taea te poitarawhiti, te poi Rewa, te poitūkohu me te whare tākaro. Ka taea te whakatū karaehe whakapakari tinana, ngā hākinakina huhua me ngā hui hākinakina nui.

Kua herea te toi me te ahurea ki te rāwhiti o Porirua, he maha ngā tāngata i hiahia ki te kite i ngā mahi toi i waho. I hiahia hoki ngā tāngata i ngā wāhi e kitea ai ngā mahi toi me ngā toi ahurea.

Wawata ki te 2045

I tētahi o ngā wāhanga o Change is Coming i te Whiringa-ā-Rangi me te Hakihea, i akiaki mātou i ngā tāngata ki te whakaaro atu ki te momo wāhi e hiahiatia ana e rātou i te paunga o 25 tau. Tōna īhua, tōna oro, me ngā momo kare ā-roto e toko ake. I patai atu ki ngā ākonga ō Corinna School me Porirua College ki tā rātou i wawata ai mō te pae tawhiti.


I titiro whakamua te tokomaha, i whakaaro atu ki te momo oranga o ā rātou tamariki, ā rātou mokopuna. Ko ētahi i whakaaro atu ki te taiao o nāianei, i hiahia kia whakapaitia. Ko ngā momo whakautu he wawata ki tētahi taha, he waewae titia ki te whenua ki tētahi atu, waihoki, he mea i takea mai i te oranga o te tangata.

Ngā mihi

Tēnā koutou katoa, ngā tāngata me ngā rōpū i whai wāhi atu ai, ki te hunga e noho ana, ngā whānau, ngā pakihī, ngā hāhi me ngā rōpū i tuku whakaaro mai ki te tarai i te rāwhiti o Porirua mō āpōpō.

Ngā wawata (kua wehea mā te kaupapa matua)

Neke atu i te 430 ngā whakautu i kohia, nā i tātarihia ngā kaupapa matua kia mōhio ai he aha ngā mea tino whakahirahira ki ngā tāngata i whakaaro ki te hapori i te pae tawhiti.



**Ko te tino
wawata - ka
hiahia au ki te
noho ki konei mō
te roanga atu o
taku oranga**

**Ka tū hei
Porirua o Te
Moana-nui-
a-Kiwa**

**Ka noho harikoa
ngā tamariki ki
tēnei wāhi hou,
nā te aroha o
te Atua**

**Ko tētahi o
ngā tino wāhi
o te ao mō te
hunga hauā**

**He Porirua
ātaahua, he wāhi e
pai ai tēnā ki tēnā**

**He hapori e
mātāmua ai ngā
mātāpono o te
aroha me te tiaki i
ētahi atu**

Kei mua i te aroaro

E wānangahia ana ngā whakautu e te tīma Porirua Development me ngā mātanga hei wāhanga o te mahere whānui, te Spatial Delivery Strategy, te mahere mō te whanaketanga o te rāwhiti o Porirua. Mā reira e whakatakohia ai te mahere whanaketanga i te pae tawhiti – ngā momo whare, pāka, toa, tiriti, ngā aha, ngā aha. Mā te Spatial Delivery Strategy e tohu atu ko ēhea ngā wāhi hei whakawhanake, te momo whanaketanga, me ngā hua whenua me ngā hua pūwāhi e wawatia ana i ēnei mahi.

Mā te Spatial Delivery Strategy hoki e whakatakoto ngā wawata me ngā hiahia e pā ana ki te pūnaha kawe tangata, te mā o te wai, te nui o ngā whare, ngā pokapū whai rawa, te marutau, ngā whare hapori, te tuakiri hapori, te whakatō rākau taketake me ētahi anō kaupapa.

Mehemea ka whai wāhi atu ngā whakaaro o te hapori, te hunga e pāngia ana e te kaupapa nei, te hunga whai whenua, iwi, kāwanatanga me ngā kāwanatanga ā-rohe ki te Spatial Delivery Strategy ka taea te tere whakatū i ngā whare ki tēnei takiwā. Ka whakatakotohia te tuhinga tuatahi o te Spatial Delivery Strategy ki te hapori hei kimi whakaaro i te 2020 hei wāhanga tuarua o tēnei mahi.